

# Manager Mike Hargrove rabia cu actuacion debil di Calvin Maduro contra Oakland

*Problemanan personal a influencia su wega*

**BALTIMORE-** Calvin Maduro a tira pa Baltimore Orioles Diamars anochi y cosnan no a bai bon, ora cu Oakland a bin gana e wega cu anotacion di 5-2, caminda e lanzador Maduro a permiti 5 càreda den cuater entrada y dos tercio.

Despues di e partido, Manager di Orioles, Mike Hargrove a muestra desapunta formalmente cu e lanzador Arubiano, y a muestra cu e no ta contento cu actuacion di Calvin den e partido aki.

"E wega aki tabata crucial pa nos y pa su persona, pero Calvin no tabata su mes. Mi a spera cu e lo a reaciona di su ultimo derota contra Oakland siman pasa pero esaki no tabata e caso," e Manager a muestra despues di e partido.

Apesar cu Orioles tin un rotacion cu basta pitcher lesiona,

Calvin tabatin mester di un bon actuacion pa sigura su posicion como habridor, pero e no a haci esaki y pa e manager esey no ta bon señal.

"Nos ta brinde tur oportunidad pa e establece su mes como habridor pero aparentemente e no ta den su wega y tin cosnan ta pasando cu e so sa," Hargrove a muestra.

Despues di e partido e manager tabata sumamente disgusta cu e lanzador y a bisa prensa tambe esey, mustrand cu el a spera mas di Maduro.

"Tabata importante, pero esey ta tur loke mi kier a bisa na e momentonan aki di e caso. Nos mester mira si Calvin por a sali y, no necesariamente domina, pero tene e team serca den e marcador. Mi no a kere cu el a haci esey awenochi," Hargrove a declara riba e asunto aki.

Oakland a probecha di e hecho cu e velocidad den lanzamentonan di Calvin ta menos cu temporada pasa y den di dos inning a haci uso di dos home run pa defini resultado di e encuentro.


Den di dos el a duna boleto na Jermaine Dye pa despues brinda su promer lanzamiento pa un home run na Ewric Chavez. Despues el a bolbe duna un boleto na Terrence Long loke a pone cu coach di pitcheo Mark Wiley a sali bai papia cune. Pero esaki no a yuda ya cu Adam Piatt a dal un home run di 422 pia pa pone e marcador na 4-0 pa Oakland.

"Mi no sa kico a pasa awenochi. Mi no sa," tabata reaccion di Calvin Maduro despues di e partido.

Loke a resalta den declaracionnan di manager Mike Hargrove, tabata e hecho cu el a papia di "problemanan personal" cu Calvin tabatin y cu e lo a supera ultimo dianan.

Però e manager no kier a menciona ki clase di problema personal e lanzador Arubiano tabatin mientras cu Calvin tampoco tabata dispuesto pa papia riba esakinan.

"Algun e cos cu el a pasa aden, a kita su concentracion for di su



trabao pa un periodo. El a pasa dor di esey caba, resolviendo e problemanan.

Pero simplemente e no tabatin dominio riba su lanzamentonan manera e tabatin temporada pasa," Hargrove a muestra.

Calvin mes a confirma cu e tabatin problema personal pero cu esey no tin nada di haber cu su actuacion tambaleante.

Ora cu a puntre si e ta 100% saludabel, Calvin a muestra: "Den mi mente, mi ta. Den mi mente mi kier ta salud."

Hargrove no kier a specula riba futuro di Calvin den e rotacion di Orioles, pero a mustera cu e tin un "plan" den mente. Jason Johnson tabata riba e lista di lesionadonan pa motibo di un fractura di su dede indice di e man drechi pero e por ta bek den e proximo simannan.

"Nos tin hende cu ta regresando di e lista di lesionadonan, y nos tin cos cu nos por haci," Hargrove a muestra.